



Republika e Kosovës – Republika Kosova  
Paneli Zgjedhor për Ankesa dhe Parashtresa  
Izborni Panel za Zhaltbe i Predstavke

Anr.163/2019

**Paneli Zgjedhor për Ankesa dhe Parashtresa (PZAP)**, në panelin e përbërë nga gjyqtarët: Rrustem Thaqi kryesues, Fejzullah Rexhepi dhe Zyhdi Haziri anëtarë, me pjesëmarrjen e zyrtares së lartë ligjore Antigona Murati, duke vendosur përkitazi me ankesën e Institutit Demokratik të Kosovës (KDI), me seli në Prishtinë, paraqitur kundër subjektit politik Lidhja Demokratike e Kosovës (LDK), me seli në Prishtinë - Dega në Komunën e Pejës, për shkak të vendosjes së posterit në hapsira publike, për Zgjedhjet e Parakohshme për Kuvendin e Republikës së Kosovës, që do të mbahen më datë 06.10.2019, në seancën e panelit të mbajtur me datë 04.10.2019, mori këtë:

### V E N D I M

**Pranohet e bazuar**, ankesa e Institutit Demokratik të Kosovës (KDI), me seli në Prishtinë, subjektit politik Lidhjes Demokratike të Kosovës (LDK), me seli në Prishtinë - Dega në Komunën e Pejës, i shqiptohet gjobë në lartësi prej 3,200.00 euro, si dhe Detyrohet ta paguaj në afat prej 15 ditëve, nga dita e pranimit të këtij vendimi nën kërcënim të përmbarimit.

### A r s y e t i m

PZAP-i, ka pranuar një ankesë me datë 01.10.2019, nga Institutit Demokratik i Kosovës (KDI), me të cilën pretendon se gjatë monitorimit të fushatës zgjedhore, për zgjedhjet e përgjithshme në vend, ka vërejtur një parregullsi të cilën e kanë evidentuar me fotografi të printuara. Paraqitësi i ankesës potencon se me datën 30.09.2019, në rrugën për në fshatrat e Rugovës, në Komunën e Pejës, përkatësisht tek Gryka e Rugovës, në hyrje të Tunelit, tek kilometri i pestë, monitoruesi i tyre ka hasur në poster të kandidatit për deputet nga Lidhja Demokratike e Kosovës (LDK), të vendosur në hapësirën publike, në hyrje të tunelit tek kilometri i pestë. Me këtë rast paraqitësi i ankesës theksion se nga Lidhja Demokratike e Kosovës (LDK), ka bërë shkelje të nenit 33 paragrafi 1 pika b) i LZP-së, Ligji Nr.03/L-073. Në mbështetje të pretendimeve ankimore ka bashkangjitur fotografi nga vendi ku ka ndodhur shkelja e Kodit të Mirësjelljes për Subjektet Politike, Mbështetësit e tyre dhe Kandidatët.

Në përgjigjën në ankesë, subjekti politik Lidhja Demokratike e Kosovës (LDK), të datës 02.10.2019, ka theksuar se në kushtet dhe rrethanat të cilat është duke u zhvilluar fushata zgjedhore dhe duke pasur parasysh faktin se komunat nuk kanë arritur ashtu siq kërkohet në dispozitat ligjore, të krijojnë hapsira të veçanta për vendosjen e materialeve zgjedhore dhe sipas tyre vendosja e posterave në hapsira publike nuk duhet të trajtohet si shkelje. Pavarësisht kësaj subjekti politik LDK, njofton se ka ndërrmar masat e duhura dhe ka evituar shkeljen e pretenduar nga kandidati në fjalë, duke larguar fotot e kandidatit për deputet dhe menjëherë pas pranimit të ankesës i kemi ndërmarr veprimet përmirësuese, pra nga këto veprime është evitar shkelja sipas pretendimeve në ankesë. Përgjigjes në ankesë si provë i kanë bashkangjitur një fotografi nga vendi ku është larguar posteri i kandidatit për deputet nga Lidhja Demokratike e Kosovës (LDK).

Paneli, pasi që shqyrtoj ankesën vlerësoi se:

### Ankesa është e bazuar

Në fotografinë e ofruara si provë nga paraqitësi i ankesës, e cila gjendet në shkresat e lëndës shihet qartë se posteri i kandidatit për deputet nga Lidhja Demokratike e Kosovës (LDK), Dega

në Pejë, është vendosur në rrugën për në fshatrat e Rugovës, në Komunën e Pejës, përkatësisht tek Gryka e Rugovës, në hyrje të Tunelit tek kilometri i pestë, veprime këto që janë në kundërshtim me nenin 33 pika b) të LZP-së, e cila përcakton “*Veprimet e ndaluara nga ana e subjekteve politike gjatë fushatës zgjedhore që ndalon vendosjen e pllakateve, posterave dhe njostimeve në apo mbi rrugët publike*”.

Duke u nisur nga gjendja e konstatuar faktike, Paneli konstaton se nga provat e ofruara shihet qartë se nga ana e subjektit politik LDK, është shkelur neni 33 pika b) i Ligjit nr. 03/L-073, për Zgjedhjet e Përgjithshme në Republikën e Kosovës, pasi që posterët e kandidatit për deputet nga LDK-ja, janë vendosur në hapësira publike – mbi rrugë, në hyrje e Tunelit.

Paneli, me rastin e vendosjes se gjobës, si në dispozitiv të këtij vendimi, ka marrë parasysh rrethanat si në vijim:

- Natyra e shkeljes dhe ndikimit të mundshëm të saj në procesin zgjedhor;
- Shkallën dhe peshën e shkeljes;
- Subjekti politik ka marrë pjesë në zgjedhjet e mëparshme, konsiderohet se kanë qenë të njoftuar me obligimet dhe përgjegjësit gjatë procesit të fushatës;
- Subjekti politik ka bërë shkelje të ligjeve zgjedhore në fuqi në këto zgjedhje apo në zgjedhjet e mëparshme në Kosovë si dhe
- Shumën e fondevë të marra nga subjekti politik prej Buxhetit të Republikës së Kosovës, për zhvillimin e aktiviteteve të lidhura me fushatën zgjedhore.

Paneli, mori parasysh të gjitha rrethanat për rastin konkret duke pasur parasysh faktin se subjekti politik LDK, nuk merr pjesë për herë të parë në zgjedhje dhe se të njëjtit janë të njoftuar me rregullat zgjedhore. Po ashtu si rrethanë, Paneli e mori edhe faktin që këtij subjekti, ia dha mundësinë për t'u përgjigjur, në ankesë dhe ta përmirësojnë shkeljen e bërë, ashtu që në përgjigjen në ankesë, nuk e kanë pranuar shkeljen e supozuar, me arsyetimin se në kushtet dhe rrethanat në të cilat është duke u zhvilluar fushata zgjedhore, dhe duke pasur parasysh faktin se komunat nuk kanë arritur të krijojë hapësira të veçanta për vendosjen e materialeve zgjedhore, të njëjtit i kanë vendosur atu ku pretendohet në ankesë.

Paneli, me rastin e gjobës së shqiptuar si ne dispozitiv të këtij vendimi, mori parasysh pretendimet subjektit politik LDK, të cilat pretendime i vlerësoi si të pa ndikim për të vendosur ndryshe. Paneli vlerësoi se subjekti politik LDK, brenda afatit të caktuar nga Paneli, ka ndërmarrë veprime për të bërë përmirësimin e shkeljes, i cili veprim ka ndikuar në shqiptimin e gjobës si në dispozitiv të këtij vendimi, sepse sipas nenit Rregullores së PZAP-it, Nr. 01/2012, shkeljet e kësaj natyre të Kodit të Mirësjelljes për subjektet politike, mund ti shqiptohet gjobë subjektit politik nga 5,100.00 euro deri në 10,000.00 euro, mirëpo siç u konstataua me lart, veprimet e subjektit politik LDK, për ta përmirësuar shkeljen, ka ndikuar në shqiptimin e gjobës.


Paneli, me këtë vendim ka për qëllim që te ndikon te subjekti politik LDK, që mos të përsërit veprimet e kësaj natyre në të ardhmen, andaj nga arsyet e theksuara me lartë e në kuptim të nenit 120 paragrafi 1 pika c) dhe nenit 118 paragrafi 1 të LZP-së, vendosi si në dispozitiv të këtij vendimi.

#### Paneli Zgjedhor për Ankesa dhe Parashtresa

Anr. 163/2019 më datën 04.10.2019

Kryesuesi i Panelit

Rrustem Thaqi



**Këshilla Juridike:** Kundër këtij vendimi nuk lejohet ankesa konform nenit 118 par. 4 të LZP-së.